
■ PCD GRISCHUNA

Deplorescha ch'ins serra l'institut a Ftan

(cp) La Partida cristiandemocratica (pcd) grischuna deplorescha zunt fitg ch'ins sto probablamain serrar l'Institut Autalpin a Ftan. La communicaziun dal cussegl d'administraziun, da terminar cun il manaschi da scola, mussa ina giada dapli quant difficila che la situaziun economica è da mantegnair en regiuns periferas dal Grischun plazzas da lavur e la qualidad da la scola. Las scolas medias privatas èn da gronda muntada economica en las regiuns periferas e garanteschon – tenor incarica costituziunala – la purschida da scolas medias decentralas.

La pcd regorda en quel connex a la discussiun a chaschun da la revisiun parziala da la lescha da la scola media che ha già lieu l'october passà en il cussegl grond. La fracziun da la pcd ha già rendì alur attent a la muntada da las scolas medias privatas. Na il davos èsi dad engraziari a deputà *Luca Tenchio* (pcd/Cuera) ch'ins ha la finala pudì dar

contribuziuns pli autas a las scolas medias e ch'igl è reussì l'ultim mument in cumpromiss en questa dumonda.

Per rinforzar las scolas medias privatas e las procurar novas pussaivladads è la fracziun da la pcd s'engaschada fitg che las scolas medias privatas avessan era pudì introducì scolas d'informati-ca. Quai avess dà a tuttas scolas medias privatas en il Grischun la libertad da promover ina attractiva purschida da scolaziun en las regiuns. Ina gronda majoritad dal cussegl grond ha dentant refusà questa pussibilitad, quai che la pcd ha già deplorà grondamain.

La pcd renda attent a la muntada d'ina purschida da scolas medias decentralas en tuttas regiuns dal Grischun e vegn vinavant a s'engaschar persuenter. Zunt impurtant è pil mument ch'ìls scolars e las scolaras da l'Institut Autalpin a Ftan possian terminar la scolaziun entschavida e ch'ì dettia persuenter er ina via en lur senn.